



Chistiona su Sardu!

Letzione N.25

Pedire permissu

Maistra: Pedire permissu, dare ispricatzones e bogare iscusas sunt sas atziones chi amus a intèndere in custa chistionada tra babbu e figios.

Lio: Oh ba'...

Giuanne: Nara...

Lio: A podimus andare a su cuntzertu istanote?

Giuanne: Eja, mi l'at naradu mama tua, benimus nois puru però. Faghimus una passigiada a pustis chena.

Micheli: Ma sunt prus de duos chilòmetros dae inoghe! Est a s'àteru chirru de sa bidda.

Giuanne: Binti minutos a pee. No est sa fine de su mundu! Cando essimus a sas noe e mesa, tenimus totu su tempus.

Lio: Ma nois tenimus apuntamentu cun Gaine ca depet festare sos annos.

Giuanne: Bene meda, gasi li faghimus sos augùrios nois puru. Tranchillos chi a pustis mama e deo andamus pro contu nostru a ascurtare sa mùsica. Ma tue, Micheli, torras a domo cun nois.

Micheli: E si est prenu de gente e non s'atzapamus?

Giuanne: Lio tenet su telefoneddu, lu lassat allutu. Andat bene?

Micheli: Ma non s'intendet nudda cun totu s'istragatzu e sa mùsica a sonu artu.

Giuanne: Basta chi su telefoneddu siat cun sa vibratzione e postu in sa butzaca de sos cartzones. Na' Micheli, ma a chie cheres improsare? La' chi si insistes ti lassamus in domo de giamu, casi bi l'aias fata, mi'.